



TEZĂUR LITURGIC
19 SEPTEMBRIE

ACATISTUL
SF. CNEJI
TEODOR, DAVID
ȘI CONSTANTIN
DE LA SMOLENSK
ȘI IAROSLAV



MOSCOVA, 2000



Акафист

СВЯТЫМ БЛАГОВЕРНЫМ КНЯЗЬЯМ

Феодору, Давиду и

Константину, Ярославским

чудотворцам

Кондак 1

Избранныи чудотворцы и велицыи угодницы Господни, градов Смоленска и Ярославля небеснии заступницы и усерднии о душах наших молитвенницы, святии благовернии князи Феодоре, Давиде и Константине, похвальное пение приносим вам с верою и любовью: вы же, яко имущии дерзновение ко Господу, от всяких нас бед молитвами вашими присно избавите, да с умилением зовем вам:

Радуйтеся, святии благовернии князе Феодоре, Давиде и Константине, преславнии чудотворцы.

Икос 1

Ангели земнии и человецы небеснии бысте, Феодоре, Давиде и Константине преблаженнии, вся заповеди Господни верно сохраниши и в добродетелех преуспевшии, яко быти вам еще во плоти, подражатели сил безплотных, жития чистотою и святостию. Темже и мы грешнии со благоговением приносим благохваления таковая:

Радуйтесь, светильницы трисияннии Божия благодати;

Радуйтесь, столпи крепцыи святыя Православныя Церкви.

Радуйтесь, во благоверии утвержденнии;

Радуйтесь, в добродетелях благоискуснии.

Радуйтесь, вернии Христовы угодницы;

Радуйтесь, многоцелебных даров независтнии подателие.

Радуйтесь, нетления цвети благоуханнии;

Радуйтесь, Рая Иисусова крини неувядаемии.

Радуйтесь, князей Российских светлая похвало;

Радуйтесь, любящих и чтущих вас присное радование.

Радуйтесь, во благоухании святости
почивающие;

Радуйтесь, недужныя безмездно исцеляющие.

Радуйтесь, святии благовернии князе
Феодоре, Давиде и Константине, преславнии
чудотворцы.

Кондак 2

Видя княже Феодор, яко братия его
неправедно восприяша удел княжения его, не
восхоте бранию ийти на них, но мир любяй,
малым княжением можайским удовлися,
праведно и свято княжение свое исправляше,
храмы Божия созидаю, благочестие
христианское утверждая, суды правосудны
людем своим являя и присно зовый в молитвах
усердных к Богу: Аллилуиа.

Икос 2

Разумом Божественным преисполненнии,
святии благовернии князе Феодоре, Давиде и
Константине, не прельститесь суетною славою
княжения земнаго, но сие мудро сочеташе со
всегдашним благоугождением Богу, яко быти
вам воистину праведником, достойным похвал
сицевых:

Радуйтесь, молитвенницы усерднии;
Радуйтесь, подвижницы неленостнии.

Радуйтесь, целомудрия хранителие;

Радуйтесь, Православия поборницы.

Радуйтесь, незлобивии в обидах;

Радуйтесь, благодушнии во искушениях.

Радуйтесь, милосердия преисполненнии;

Радуйтесь, кротостию злобу побеждавшии.

Радуйтесь, дивно о Господе сочетаннии, отец со чады во святых;

Радуйтесь, Троицы равночисленнии избранницы, сыны с родителем в селениях райских.

Радуйтесь, от горних высот к земнородным милостивно приникающия;

Радуйтесь, исцеления благодатныя неоскудно источающии.

Радуйтесь, святии благовернии князе Феодоре, Давиде и Константине, преславнии чудотворцы.

Кондак 3

Силою Божию осененный, княже Феодоре, княжение ярославское восприял еси, и в нем благочестно о Христе потрудился еси, яко добрый воин Иисусе Христов, готовый душу твою положить за люди твоя. Темже и к агарянскому хану шествовати не убоялся еси, и пред ним веру Христову ясно исповедал еси, вопия сердцем и усты ко Господу: Аллилуиа.

Икос 3

Имуще едино попечение в триех телесех, о еже Единому Богу благоугождати, святии благовернии князе Феодоре, Давиде и Константине, образ жития праведнаго в себе нам являете, сим подвизающе нас, в похвалах достождных вопити вам сице:

Радуйтеся, Богомудрия преисполненнии;

Радуйтеся, лучами Святаго Духа озареннии.

Радуйтеся, свети умнии, ношь грехов наших пресекающии;

Радуйтеся, звезды путеводныя, ко Христу путь верным ясно указующия.

Радуйтесь, бисере драгоценнии, в небесней сокровищнице Христовой сохраняемии;

Радуйтесь, адаманты, сияющи Божиею благодатию.

Радуйтесь, диадиму княжения земнаго с венцем Царствия Небеснаго сочетаавшии;

Радуйтесь, Рая жители порфириноснии.

Радуйтесь, в Бозе упокоение блаженнее обретшии;

Радуйтесь, по трудех и подвизех земных сладце на лоне Авраамли опочившии.

Радуйтесь, древних святых церквей вернии поборницы;

Радуйтесь, Царя царей приснии друзи.

Радуйтесь, святии благовернии князе Феодоре, Давиде и Константине, преславнии чудотворцы.

Кондак 4

Буря искушений приразися к тебе, княже Феодоре, пребывающу ти при дворе хана агарянского, иже восхоте имети тя супруга дщери своея: обаче ты союза супружества христианскаго нарушити не восхотев,

небоязненно от брака с неверною уклонился еси, дондеже скончася супруга твоя законная: по ея же кончине, дочь ханскую, во Христа уверовавшую, крещением святым просветив, бракосочетася с нею, зовый ко Господу: Аллилуиа.

Икос 4

Слышавше людие ярославстии о великих добродетелех ваших, святии благовернии князе Феодоре, Давиде и Константине, зело почитаху вас, яко избранников Божиих: вы же, блажении, милостивно над ними княживше, отцы им по Бозе бысте, учителя благочестия и наставницы во всех добрых делех. Сего ради доднесь подвиги ваши незабвенны во градах Смоленске и Ярославле, и воспеваются немолчными гласы сицевыми:

Радуйтесь, благодетели нищих и убогих;

Радуйтесь, покровители вдов и сирот.

Радуйтесь, нелицеприятнаго суда рачители;

Радуйтесь, милосердия Христова подражатели.

Радуйтесь, суды ваши с милостию соединившии;

Радуйтесь, правосудие христианское возлюбившии.

Радуйтесь, добрии оружницы Всевышняго Царя;

Радуйтесь, вернии раби Небеснаго Домовладыки.

Радуйтесь, верою православною воодушевленнии;

Радуйтесь, надеждою спасения укрепленнии.

Радуйтесь, любовью Божественною преисполненнии;

Радуйтесь, Богом и людьми возлюбленнии.

Радуйтесь, святии благовернии князе Феодоре, Давиде и Константине, преславнии чудотворцы.

Кондак 5

Боготечной звезде подобствовав, княже Феодоре, от хана агарянского отпущенный, княжити во град Ярославль пришел еси, с супругою твоею и чады Давидом и Константином, яже быша благаго древа благия отрасли, плод мног о Христе отечеству своему принесшии, с нимиже ныне во светлостех

святых водворяяся, сладце поеши святых
Святейшему Христу Богу: Аллилуиа.

Икос 5

Видим вас святии благовернии князе
Феодоре, Давиде и Константине, яко звезды
богосветлыя, во граде Ярославли святостию и
чудесы сияющия, и сиянием славы вашей
озаряеми, прославляем прославльшаго вас Царя
славы Христа, вам же со усердием и любовью
вопием таковая:

Радуйтесь, блаженнии и триблаженнии,
целомудрие сохранившии;

Радуйтесь, благовернии и богоноснии, в
законе Господни непорочно ходившии.

Радуйтесь, заповеди Христовы свете стезям
вашим имевшии;

Радуйтесь, во всех оправданиях Владычних
неуклонно пребывшии.

Радуйтесь, всю жизнь вашу на
Богоугождение непрестанное посвятившии;

Радуйтесь, до смерти верность Господеви
соблюдшии.

Радуйтесь, во всем волю Божию творившии;

Радуйтесь, искушения и скорби мужески терпевшии.

Радуйтесь, во искушениях победоноснии;

Радуйтесь, в скорбех не унывавшии.

Радуйтесь, на Бога все упование ваше возложившии;

Радуйтесь, от Бога в уповании вашем непосрамленнии.

Радуйтесь, святии благовернии князе Феодоре, Давиде и Константине, преславнии чудотворцы.

Кондак 6

Проповедник благочестия явился еси княже Феодоре, егда узрев приближение кончины живота твоего, княжение земное оставль, в обитель Преображения Господня удалился еси, и тамо во иночество постриженный, схиму святую на ся возложил еси, со всеми прощаяся, всех благословляя и назидая, в молитве усердней душу твою в руке Божии предал еси, яко истинный угодник Христа Бога, Емуже со ангелы поеши ныне: Аллилуиа.

Икос 6

Возсиясте многими добродетельми вашими во граде Ярославли, и всю страну Российскую благодатно озаристе преславными чудесы вашими, Феодоре, Давиде и Константине благовернии. Темже память ваша с похвалами от верных почитается, и честная имена ваша молитвенно призываются, от ближних и дальних, к вам вопиющих и глаголющих:

Радуйтесь, мрак душ наших чудесы вашими благодатно просвещающие;

Радуйтесь, недужных безмезднии врачеве.

Радуйтесь, больных цельбоподательнии посетители;

Радуйтесь, туне приявшии и туне подающие.

Радуйтесь, в милости к страждущим никогдаже оскудевающие;

Радуйтесь, сосуди златии миро многоцелебнаго.

Радуйтесь, сокровищницы драгия, на всяк недуг врачевство содержащая;

Радуйтесь, радости печальным податели.

Радуйтесь, скорбящих блазии утешителие;

Радуйтесь, бедствующим скории помощницы.

Радуйтесь, градов Смоленска и Ярославля небеснии покровители;

Радуйтесь, святии благовернии князе Феодоре, Давиде и Константине, преславнии чудотворцы.

Кондак 7

Хотяй во всем подражати отцу твоему преподобному, преблаженне княже Давиде, свято и богоугодно в Ярославли по нем княжил еси, и толико Богу угодил еси, яко миром и благоплодием княжение твое Господь благослови и славна тя в князех российских показа, Емуже ты в преподобии и святости добре послужил еси до смерти, взывая к нему: Аллилуиа.

Икос 7

Новых вас чудотворцев яви Господь в стране российстей, святии благовернии князе Феодоре, Давиде и Константине, чудеса вашими святую православную веру крепко утверди во граде вашем, иже светло красуется, имея вас небесных заступников и предстателей ко Господу, и с любовью к вам взывает:

Радуйтесь, хладную страну теплотою веры
вашея согревшии;

Радуйтесь, благочестие во граде вашем
возрастившии.

Радуйтесь, добрии делатели винограда
небеснаго;

Радуйтесь, мзду приемшии от Христа:
чудотворения дар.

Радуйтесь, дары милости вашея верных
обогащающии;

Радуйтесь, Божия благодати сосуди
избраннии.

Радуйтесь, сияющии, яко солнце во Царствии
Небеснем;

Радуйтесь, яко звезды всю Россию чудесы
вашими освещающии.

Радуйтесь, трисияннии лучи, Троический
несозданный свет нам возсияющии;

Радуйтесь, тричисленнии подвижницы
добродетелей Христианских.

Радуйтесь, на враги видимыя и невидимыя
нам всегдашнии споборницы;

Радуйтесь, Царя Небеснаго Христа известнии умилоствители.

Радуйтесь, святии благовернии князе Феодоре, Давиде и Константине, преславнии чудотворцы.

Кондак 8

Странника и пришельца в мире сем помышляя себе быти, благоверный княже Константине, от юности твоея девственное житие возлюбил еси, в посте и молитвах пребывая, и угождая Богу благоугождением всяческим, во еже быти тебе освященному сосуду Духа Святаго, всельшагося в непорочное сердце твое, и воздыхании неизглаголанными научившаго тя благоприятно пети Пресвятей Троице: Аллилуиа.

Икос 8

Весь град Ярославль радостию духовною подвижесе, егда святыя и нетленныя мощи ваша, благовернии князе Феодоре, Давиде и Константине, чудес благодатию просияша во обители Преображения Господня. Тако бо благоволи Господь, да по летех мнозех, нетление ваших телес святых всем явлено будет, и чудесы

многими ознаменуется, во еже всем верным
вопити вам сице:

Радуйтесь, во умерщвленных телесех жизнь
благодатную проявивши;

Радуйтесь, во летех мнозех нетленнии в
составех ваших пребывшии.

Радуйтесь, во едином гробе благолепно мирно
почивающии;

Радуйтесь, вси трие вкупе чудодействующии.

Радуйтесь, во уверении святости вашае чудес
множество от мощей ваших сотворившии;

Радуйтесь, неверовавших в святость вашу
грозно наказавшии.

Радуйтесь, слепим зрение даруяй;

Радуйтесь, хромым право ходити устрояй.

Радуйтесь, глухим слух отверзаяй;

Радуйтесь, немым язык разрешаяй.

Радуйтесь, бесноватых от насилия
демонскаго свободяяй;

Радуйтесь, расслабленных благодатно
укрепляяй.

Радуйтесь, святии благовернии князе Феодоре, Давиде и Константине, преславнии чудотворцы.

Кондак 9

Со всеми небожители ныне сликовствуете горе, во славе Царствия Христова, благовернии чудотворцы Феодоре, Давиде и Константине, в нейже пребывающе, помяните и нас смиренных в молитвах ваших к Триипостасному Богу, да при помощи вашей небесней, сподобимся во вся дни, достойно и праведно возглашати Ему: Аллилуиа.

Икос 9

Витийство человеческое не может восхвалити по достоянию, многая и преславная чудотворения ваша, святии благовернии чудотворцы Феодоре, Давиде и Константине. Обаче мы, любовью к вам подвизаемии, дерзаем благохвалити вас, заступников наших, сими нехитростными, но усердными словесы:

Радуйтесь, две жены слепыя у мощей ваших прозрети сотворшии;

Радуйтесь, беноватаго и слепаго мужа таможде исцелившии.

Радуйтесь, слепую отроковицу видети устроивши;

Радуйтесь, бесноватих мужа и жену от насилия демонского избавивши.

Радуйтесь, четыре немощныя зело жены здравы возставивши;

Радуйтесь, ину жену, терзавшую неистовно все тело свое, от недуга сего свободивши.

Радуйтесь, неверовавшего в святость вашу пресвитера Константина, расслаблением тела наказавши;

Радуйтесь, святителя Трифона в томже благодатно обличивши.

Радуйтесь, покаяние его милостивно приемши;

Радуйтесь, во обители вашей почити ему о Господе удостоивши.

Радуйтесь, благоверную царицу Анастасию в недуге уврачевавши;

Радуйтесь, ближним и дальним милость многоцелебную показавши.

Радуйтесь, святии благовернии князе Феодоре, Давиде и Константине, преславнии чудотворцы.

Кондак 10

Спастися нам молитве милостиваго Бога, чудотворцы святии и благовернии Феодоре, Давиде и Константине: к вам бо по Бозе и Пресвятей Богородице, яко присным нашим предстателем и ходатаем мы грешнии усердно прибегаем и молитвенно просим вас о еже молитися за нас к прославльшему вас Господу, да и мы сподобимся вкупе с вами на земли живых пети Ему: Аллилуиа.

Икос 10

Царя Небеснаго Христа вернии раби и угодницы, святии благовернии князе Феодоре, Давиде и Константине, покажите на нас недостойных молитв ваших благодатное действие, и якоже многих недужных уврачевали есте, с верою приходящих к святым и многоцелебным мощем вашим, тако и нас, с любовью к ним припадающих, не лишите небеснаго вашего заступления, в жизни, в смерти и по смерти, да зовем вам хвалебно:

Радуйтесь, отечествия вашего земного неотступнии хранители;

Радуйтесь, ко отечествию Горнему вернии нам руководителие.

Радуйтесь, источницы многоводнии благодатных исцелений;

Радуйтесь, кладези неистоцимыя воды живыя.

Радуйтесь, Воскресения Христова силу в телесех ваших нетленних дивно проявившии;

Радуйтесь, зарю общаго воскресения нам от раки вашей возсиявающии.

Радуйтесь, росу Божия благодати в сердца верных орождавающии;

Радуйтесь, благая прошения наша во блага исполняющии.

Радуйтесь, с верою просящих у вас исцеления скоро врачующихи;

Радуйтесь, любящим и чтущим вы, любовию сугубою воздающихи.

Радуйтесь, в простоте душевней на помощь призывающих милостивии услышатели;

Радуйтесь, безнадёжных страдальцев
Божественнии целители.

Радуйтесь, святии благовернии князе
Феодоре, Давиде и Константине, преславнии
чудотворцы.

Кондак 11

Пение молебное наше и похвалу сию
смиренную благоутробно примите, святии
благовернии князе Феодоре, Давиде и
Константине: се бо аще и многогрешни есмы, но
веруем несумненно, яко вы, святии предстатели
наши, много можете пред лицом всеблагаго Бога
и яко молитвы ваша святыя сильны спасти нас
от погибели вечныя. Темже молим вы: не
посрамите веры нашея во всеильное пред
Богом ходатайство ваше, но сподобите нас
молитвами вашими Царствие Небесное улучшить,
и со всеми святыми возглашати Троидиному
Богу: Аллилуиа.

Икос 11

Светоподательнии светильницы и предивнии
чудотворцы, святии благовернии князе Феодоре,
Давиде и Константине, к вам от лет древних
отцы наши верно приходяще, милость многу от

вас получаху, их же путем и мы к вам шествуем и припадающе к святым мощем вашим, молим и просим вы: да якоже отцем нашим, тако и нам убозем милость вашу присно являете, да благодарственно вам всегда вопием:

Радуйтесь, чада благословенная Отца Небеснаго;

Радуйтесь, братия по благодати Христа, Сына Божия.

Радуйтесь, светлыя обители Духа Святаго;

Радуйтесь, хвалебницы чудотворнии Пресвятыя Троицы.

Радуйтесь, во свете Лица Божия присно пребывающии;

Радуйтесь, по Бозе вся потребная нам взыскующии.

Радуйтесь, от Горних высот на помощь к нам ускоряющии;

Радуйтесь, грешники к покаянию невидимо направляющии.

Радуйтесь, окамененная сердца прикосновением к мощем вашим умягчающии;

Радуйтесь, плоды покаяния верным приносить помогающие.

Радуйтесь, о спасении нашем усердно Бога умоляющие;

Радуйтесь, во всяком деле блазе нам по вере нашей благопоспешающие.

Радуйтесь, святии благовернии князе Феодоре, Давиде и Константине, преславнии чудотворцы.

Кондак 12

Благодать и милость от Господа испросите нам, святии князе Феодоре преподобне, Давиде и Константине преблаженнии, и в час кончины нашея предстаните в помощь нам, требующим вашего заступления, насилия диавольскаго нас избавляюще, святыми и благомошными молитвами вашими: да при помощи их безбедно преидем трудный путь мытарств воздушных, и сподобимся в селениях святых пети Создателю нашему: Аллилуиа.

Икос 12

Поюще многая и преславная ваша чудеса, святии благовернии князе и чудотворцы Феодоре, Давиде и Константине, славим

Господа, прославльшаго вас на Небеси и на земли, и от любве душевныя совершающе святую и всерадостную память вашу, умильно к вам глаголем:

Радуйтесь, Пресвятая Троицы вернии раби;

Радуйтесь, Пресвятая Богородицы органе хвалебнии.

Радуйтесь, Ангельских воинств собеседницы;

Радуйтесь, всех святых сожители.

Радуйтесь, страны Российския духовная лепото;

Радуйтесь, града Ярославля светлая красото.

Радуйтесь, князей Российских к благочестию предводители;

Радуйтесь, княжения вашего земнаго неусыпнии блюстители.

Радуйтесь, обители вашея святая забрала несокрушимая;

Радуйтесь, подвизающимся в ней спасения душевнаго ходатаи.

Радуйтесь, на поклонение к мощем вашим приходящих любвеобильно приемлющи;

Радуйтесь, благословение ваше святое от раки вашей всем верным подающий.

Радуйтесь, святии благовернии князе Феодоре, Давиде и Константине, преславнии чудотворцы.

Кондак 13

О святии чудотворцы, тричисленнии Пресвятая Троицы угодницы, благовернии князе Феодоре, Давиде и Константине, милостивно примите сие малое моление наше, в похвалу вам приносимое, и умолите триипостаснаго Господа и Владыку нашего, избавити нас мучений вечных, грешником уготованных, и сподобити нас в покаянии Ему благоугодити, и Царствие Небесное наследовати, да с вами вопием ему во веки: Аллилуиа.

Этот кондак читается трижды, затем икос 1-й и кондак 1-й

Молитва

О велиции угодницы Божии и чудотворцы, святии и благовернии князе Феодоре, Давиде и Константине, припадающе к святым и многоцелебным мощем вашим, молим вы со смирением, верою и любовью: прострите

благоприятные молитвы ваша ко Господу и Создателю нашему, и умолите Его благость, даровати нам вся нужная к житию сему временному, и потребная к вечному спасению нашему: веруем бо несумненно, яко вся возможна вам, яко истинным Его угодником. Сего ради просим вы: испросите нам у Царя царствующих и Господа господствующих страждущую страну Российскую от лютых безбожников и власти их Господь да свободит, верных рабов Его, в скорби и печали день и ночь вопиющих к Нему, многоболезный вопль да услышит и да изведет от погибели живот наш. Испросите престольным градом, граду нашему и всем градом Российским благополучие, изобилие и от злых сохранение, всем же правоверным людям, почитающим вас, и на поклонение мощем вашим святым приходящим, милость Божию и благих прошений скорое исполнение. Ей, чудотворцы святии, не посрамите упования нашего, но молитвами вашими сотворите нас наследники быти Царствия Христова: да прославляем человеколюбие в Троице славимаго и поклоняемаго Бога, Отца и Сына, и Святаго

Духа, и ваше святое заступление во веки веков.
Аминь.

